



*Komunikadu Imprensa*

*Periodu: 2010*

*Edisaun: 14, Outubru, 2010*

**Tribunál Distritál Baucau hala'o julgamentu ba kazu Maus Tratus ba Konjuje**

Iha lora 06 Fulan Outubru 2010, Tribunál Distritál Baucau hala'o julgamentu ba kazu maus tratus ba konjuje ho numeru prosesu 242/TDB/ 2009. Arguidu ba kazu ne'e ho inisial ASA komete aktu maus tratus hasoru lezada FS ne'ebé nudar nia fen kaben. Alende ne'e lezada ho idade avansada. Kazu refere akontese iha areia Sucu Uaguia, Sub Distrito Ossu, Distrito Viqueque.

Prosesu julgamentu ba kazu ne'e derije husi Juiz kolektivu Dr. Afonso Carmona, no akompaña husi Dra. Edite Palmira dos Reis, Dra. Ana Paula Fonseca de Jesus, parte Ministériu Públiku reprezenta husi Dr. Jose da Costa Ximenes, Defeza akompaña husi Dr. Sergio Quintas husi Defensoria Públiku no Ofisial Justisa Sra. Martinha da Costa.

Direitór Ezekutivu JSMP, Luis de Oliveira Sampaio hateten katak: *“kazu maus taratus ba konjuje ka ema ne'ebé mak moris ho nia hanesan fen ho laen, ne'e nu'udar hahalok krime ne'ebé tenke prosesu tuir lei ne'ebé vigor. Tanbá kazu ne'e fo impaktu direktamente ba lezada no halo lezada moris iha situasaun no ambiente ne'ebé la seguru, sente emeasadu, la hakmatek no viola nia direitu ba integridade no seguransa pesoal nian. Aleinde ne'e refere ba kondisaun lezada ne'ebé mak ho idade avansada laiha forsa atu rejiste hasoru aktu kriminal ne'ebé komete husi nia laen rasik. tambá ne'e husu ba tribunál ne'ebé kompetente antes hamonu desizaun tenke refere mos ba faktu hirak ne'ebé produs iha prosesu julgamentu laran”*

Bazea ba kronolojia problema ne'ebé akontese katak, iha lora 24 fulan Juñu 2009, iha Suku Uaguia Sub Distrito Ossu, Distrito Viqueque, arguidu ho inisial ASA ne'ebé mos hanesan lezada nia kaben tuir lezada ba iha natar hodi lori aisanak baku lezada ninia kotuk laran, tuku husi hasan to'o monu ba natar laran depois arguidu tun hodi baku dala barak iha lezada nia isin lolon, to'o aisanak tohar. Liu tan, arguidu nafatin tuku no tebe iha vítima nia oin no hirus matan. Arguidu mos lori katana nia belar hodi baku iha lezada nia ulun fatuk to'o oin bubu no metan hotu.

Depois ne'e lezada akompaña husi nia maun sira hodi ba baixa iha hospital durante lora tolu nia laran. Arguidu deklara mos katak nia prátika aktus kriminal ne'e hasoru lezada ho razaun katak, lezada faan tiha sira nia karau ida no estraga mos arguidu nian osan ba terseira idade ho total \$. 240 ne'ebé arguidu rai atu selu oan nia eskola.

Iha prosesu ne'e, arguidu mos komfesa katak, los duni nia prátika aktu refere. Tuir deklarasaun husi lezada katak, inisiu husi sira nain rua moris hamutuk to'ogora arguidu halo bebeik presaun psikolojika, no mal trata ba nia hanesan fen kaben. Tamba ne'e, lezada deklaraba iha tribunál katak, nia lakohi simu tan arguidu nudar nia laen tambá nia trauma ho hahalok ne'e.

Nune'e mos depoimentu husi testemuña BS haktuir katak, nune'e duni iha momentu ne'eba testemuña ho lezada ba iha natar depois arguidu tuir ba hodi prátika hahalok ne'e no nia mos trauma atu hare aktu ne'ebé akontese.

Bazeia ba faktus hirak ne'e parte Ministériu Públiku akuza arguidu hanesan autor materil ne'ebé komete krime maus tratus ba nia konjuje ho artigu 154 Kódigu Penál Timor Leste ho nia pena abstrata tinan 2 to'og tinan 6 prizaun.

Iha parte seluk, defeza husi arguidu nian mos rekuñese katak arguidu mak komete duni hahalok ne'e, maibe husu ba meritisimu juiz koleтиву ne'ebé mak derize julgamentu ida ne'e hodi la aplika pena prizaun maibe karik suspensaun ba pena, tamba arguidu ho idade avansadu. Aleinde ne'e arguidu mos iha kooperasaun diak ho tribunál. Razaun seluk mak arguidu nu'udar uniku ema ne'ebé mak iha responsabilidade ba nia oan nain hitu tamba depois akontesementu ne'e, lezada la hela hamutuk ona ho arguidu.

Tuir observasaun JSMP iha prosesu julgamentu ba kazu ne'e hatudu katak, tribunál iha duni esforsu masimu hodi notifika partes hotu ne'ebé tuir lei hodi marka sira nia prezensa, iha julgamentu. Refere ba faktus ne'ebe iha katak, kazu ne'ebé akontese kleur ona durante tinan ida nia laran.

Alende ne'e iha parte seluk JSMP mos lamenta ho prosesu julgamentu ne'ebé lidera husi tribunál koleтиву ida ne'e. Tamba hare ba situasaun balun katak, juiz sira la amigavel bainhira halo perguntas ba lezada ho meus ida ne'ebé halo lezada la konfortavel ka sente la fiar an hodi fo resposta ba perguntas hirak ne'e. Ho nune'e ne'e JSMP rekomenda ba tribunál kompetente nune'e iha futuru bele kria ambiente julgamentu ne'ebé amigavel ba parte sira ne'ebé tribunál notifika ona, hodi partes sira bele iha korazen hodi deklarar verdade no lia los ba iha tribunál.

Atu hetan informasaun kompleitu kontaktu:

Luis de Oliveira Sampaio

Direitór Ezekutivu JSMP

Diresaun Email: [luis@jsmp.minihub.org](mailto:luis@jsmp.minihub.org)

Landline: 3323883